

JAMHURI YA MUUNGANO WA TANZANIA

OFISI YA RAIS - TAMISEMI



TAARIFA KWA UMMA

**TAARIFA KWA UMMA KUHUSU ZOEZI LA UCHAGUZI WA WANAFUNZI WA
KUJIUNGA NA KIDATO CHA TANO NA VYUO VYA ELIMU NA MAFUNZO YA
UFUNDI KWA MWAKA 2021**

Ndugu Wanahabari;

Zoezi la Uchaguzi wa Wanafunzi wa Kujiunga na Kidato cha Tano katika Shule za Sekondari za Serikali na Vyuo vya Elimu na Mafunzo ya Ufundi Mwaka 2021, limekamilika. Zoezi hili limefanyika kwa kuzingatia takwimu za matokeo ya Wanafunzi waliofanya Mtihani (watahiniwa) wa Kidato cha Nne Mwaka 2020, kutoka Tanzania Bara.

Ndugu Wanahabari;

Matokeo ya Kidato cha Nne 2020 yanaonesha kuwa Watahiniwa wa Shule waliopata Daraja la I – III walikuwa **153,464** wakiwemo wasichana **67,135** na wavulana **86,329** sawa na asilimia **35.06** ya watahiniwa waliofanya mtihani. Watahiniwa wa kujitegemea waliofanya mtihani wakiwa chini ya Taasisi ya Elimu ya Watu Wazima (TEWW) waliofaulu kwa Daraja la I - III ni **479** wakiwemo wasichana **289** na wavulana **190**.

Wanafunzi waliokidhi vigezo na ambao wana sifa za msingi za kuchaguliwa kujiunga na Kidato cha Tano na Vyuo vya Elimu na Mafunzo ya Ufundi kwa mwaka 2021 ni **148,127** wakiwemo wasichana **63,878** na wavulana **84,249** sawa na asilimia **33.84** ya waliofanya Mtihani wa Kidato cha Nne Mwaka, 2020. Idadi hiyo ya wanafunzi wenye sifa imejumuisha wanafunzi wenye Mahitaji Maalum **288** wakiwemo Wasichana **123** na Wavulana **165**. Aidha, watahiniwa wa kujitegemea waliofanya mtihani wakiwa chini ya Taasisi ya Elimu ya Watu Wazima ni **287** wakiwemo wasichana **149** na wavulana **138**.

Ndugu Wanahabari;

Wanafunzi waliochaguliwa kujiunga na Kidato cha Tano na Vyuo vya Elimu na Mafunzo ya Ufundi Mwaka **2021**, ni kutoka Shule za Serikali, zisizo za Serikali, watahiniwa wa kujitegemea waliofanya mtihani wakiwa chini ya Taasisi ya Elimu ya Watu Wazima na waliosoma nje ya nchi ambao matokeo yao yamefanyiwa ulinganifu wa Baraza la Mtihani Tanzania (NECTA).

Jedwali Na. 1: Linaonesha wanafunzi wenye sifa na waliochaguliwa kujiunga na Kidato cha Tano na Vyuo vya Kada mbalimbali na waliobaki

MAELEZO	Wasichana	Wavulana	Jumla
Watahiniwa wenye Sifa	63,878	84,249	148,127
Waliochaguliwa Kidato cha Tano	41,885	45,778	87,663
Vyuo vya Elimu ya Ufundi, Afya, Ualimu na Kada mbalimbali	21,993	34,913	56,906
Jumla ya Waliochaguliwa	63,878	80,691	144,569
Jumla ya Waliokosa nafasi	0	3,558	3,558

Jedwali Na. 2 linaonesha mchanganuo wa Wanafunzi Waliochaguliwa kujiunga na Kidato cha Tano na Vyuo vya Kada mbalimbali Mwaka, 2021

	MAELEZO	2021		
		Ke	Me	JML
1.	Waliofanya Mtihani	227,695	210,003	437,698
2.	Wenye Sifa za kuchaguliwa Kidato cha Tano na Vyuo vya Elimu ya Ufundi	63,878	84,249	148,127
3.	Waliochaguliwa K5 - Masomo ya Sayansi na Hisabati	17,646	23,858	41,504
4.	Waliochaguliwa K5 - Masomo ya Sanaa na Biashara	24,239	21,920	46,159
5.	Waliochaguliwa kujiunga Vyuo 4 vya Elimu ya Ufundi	592	1006	1598

	MAELEZO	2021		
		Ke	Me	JML
6.	Wanafunzi waliochaguliwa kujiunga na Vyuo vya Ualimu (Stashahada & Astashahada)	3,535	3,931	7,466
7.	Wanafunzi waliochaguliwa kujiunga na Vyuo vya Afya	1,162	1,073	2,235
8.	Wanafunzi Waliochaguliwa kujiunga katika Vyuo mbalimbali	16,704	28,903	45,607
9.	JUMLA Waliochaguliwa K5, Vyuo 4 Vya Elimu ya Ufundi na Vyuo mbalimbali)	63,878	80,691	144,569

Jumla ya wanafunzi **87,663** wakiwemo wasichana **41,885** na wavulana **45,778** sawa na asilimia **59.18** ya wenye sifa wamechaguliwa kujiunga na Kidato cha Tano katika shule **476** za Serikali zikiwemo shule mpya **42**, Kati yao wanafunzi wenye mahitaji maalumu walikuwa **288** wakiwemo wasichana **123** na wavulana **165** sawa na asilimia 100% ya wenye Mahitaji Maalum waliokuwa na sifa za kujiunga na Kidato cha Tano.

Kati ya wanafunzi waliochaguliwa Kujiunga na Kidato cha Tano, wanafunzi **41,504** wakiwemo wasichana **17,646** na wavulana **23,858** sawa na asilimia **47.34**, watajiunga kusoma tahasusi za Sayansi na Hisabati; wanafunzi **46,159** wakiwemo wasichana **24,239** na wavulana **21,920** sawa na asilimia **52.66** wamechaguliwa kusoma tahasusi za masomo ya Sanaa na Biashara.

Ndugu Wanahabari;

Wanafunzi **1,598** wakiwemo wasichana **592** na wavulana **1,006** wamechaguliwa kujiunga na fani mbalimbali katika Vyuo vinne vya Ufundi ambavyo ni Chuo cha Ufundi Arusha (ATC), Taasisi ya Teknolojia Dar es Salaam (DIT), Chuo cha Usimamizi wa Maendeleo ya Maji (WDMI) na Chuo Kikuu cha Sayansi na Teknolojia Mbeya (MUST).

Ndugu Wanahabari;

Jumla ya wanafunzi **55,308** wakiwemo wasichana **21,401** na wavulana **33,907** wamechaguliwa kujiunga kwenye kozi mbalimbali za ngazi ya Astashahada na Stashahada (Certificate and Ordinary Diploma) katika Vyuo vya Elimu na Mafunzo ya Ufundi vinavyosimamiwa na Baraza la Taifa la Elimu ya Ufundi (NACTE) na Wizara ya Elimu, Sayansi na Teknolojia ambapo Wanafunzi **2,235** wakiwemo wasichana **1,162** na wavulana **1,073** wamechaguliwa kujiunga na Vyuo vya Afya ngazi ya Stashahada. Wanafunzi **5,757** wakiwemo wasichana **2,798** na wavulana **2,959** wamechaguliwa kujiunga na Vyuo vya Ualimu ngazi ya Astashahada ya Elimu Maalum, Awali, Michezo, Msingi na Ualimu wa Shule zinazofundisha kwa kutumia Lugha ya Kiingereza (English Medium). Wanafunzi **1,709** wakiwemo wasichana **737** na wavulana **972** wamechaguliwa kujiunga na Vyuo vya Ualimu ngazi ya Stashahada ya Sayansi, Hesabu na TEHAMA. Vilevile, Wanafunzi **45,607** wakiwemo wasichana **16,704** na wavulana **28,903** wamechaguliwa kujiunga na Vyuo vya Elimu na Mafunzo ya Ufundi katika Kada mbalimbali.

Ndugu Wanahabari;

Napenda kutumia fursa hii, kuwataarifu kuwa lengo la Rais wa Awamu ya Sita Mheshimiwa Samia Suluhu Hassan la kuwainua wanawake limeonekana ambapo katika mwaka huu, wanafunzi wote wasichana 63,878 wenye sifa wamechaguliwa kujiunga na Kidato cha Tano na Vyuo vya Elim una Mafunzo ya Ufundi.

Ndugu Wanahabari;

Muhula wa kwanza kwa wanafunzi wa Kidato cha Tano utaanza tarehe **05 Julai, 2021**. Hivyo, wanafunzi wote waliopangwa kujiunga na Kidato cha Tano kwa mwaka **2021** wanapaswa kuanza kuripoti katika shule zao kuanzia tarehe **03 Julai, 2021**. Siku ya mwisho ya kuripoti itakuwa tarehe **18 Julai, 2021**. Endapo mwanafunzi atachelewa kuripoti nafasi yake itachukuliwa na mwanafunzi mwingine aliyekosa nafasi.

Ndugu Wanahabari;

Serikali ya Awamu ya Sita ingependa kuona wanafunzi wote waliochaguliwa kwenda Kidato cha Tano wanajiunga kwa pamoja ndani ya muda uliopangwa. Hivyo, Serikali inawahimiza Wanafunzi ambao wameshakata shauri kujiunga na shule za Binafsi kuthibitisha kujiunga na shule hizo kupitia mfumo wa "Selform" uliotumika wakati wa kubadilisha tahasusi. Aidha, Wakuu wa shule za Binafsi ambazo wanafunzi watadhibitisha kujiunga nazo, watatakiwa kuthibitisha kuwatambua wanafunzi hao kupitia mfumo wa "Selform". Nafasi zitakazopatikana kwa njia hii zitajazwa na wanafunzi kwenye "**Second Selection**" ili nao waweze kujiunga na shule kwa muda sawa na wenzao.

Ndugu Wanahabari;

Fomu za maelezo ya mahitaji ya kujiunga na Kidato cha Tano (*Joining Instructions*) kwa shule zote za Kidato cha Tano zinapatikana kwenye tovuti ya OR-TAMISEMI kupitia kiunganishi cha www.tamisemi.go.tz. Vilevile, mfumo wa Selform unaendelea kupatikana kupitia anuani ya selform.tamisemi.go.tz.

Ndugu Wanahabari;

Uchaguzi wa wanafunzi wa kujiunga na Kidato cha Tano na Vyuo vya Elimu na Mafunzo ya Ufundi umefanyika kwa kuzingatia ufaulu na nafasi zilizopo katika shule; hivyo, **hakutakuwa na fursa ya kufanya mabadiliko yoyote ya shule kutokana na ukosefu wa nafasi kwenye shule husika.**

Ndugu Wanahabari;

Kwa wanafunzi waliopangwa kwenye Vyuo vya Elimu na Mafunzo ya Ufundi wanapaswa kuthibitisha kukubali kujiunga na kozi walizochaguliwa kuanzia tarehe ya leo hadi ifikapo tarehe **8 Agosti, 2021**. Wanafunzi hawa watatakiwa kufanya Uthibitisho kuwa wamekubali Kozi na Vyuo walivyopangiwa kwa njia ya mtandao kupitia tovuti ya Baraza la Taifa la Elimu ya Ufundi (NACTE) ambayo ni www.nacte.go.tz kupitia kiunganishi kinachoitwa Uthibitisho TAMISEMI. Kwa mwanafunzi atakayeshindwa kuthibitisha kozi na chuo alichopangiwa, nafasi yake itachukuliwa na wanafunzi wengine wanaondelea kuomba katika vyuo husika kwa njia ya mtandao.

Kwa mwanafunzi atakayetaka kufanya mabadiliko ya kozi na chuo alichopangiwa ataruhusiwa kufanya hivyo kuanzia tarehe **9 - 23 Agosti, 2021** kupitia tovuti ya NACTE ya www.nacte.go.tz.

Ndugu Wanahabari;

katika Awamu ya Sita chini ya uongozi wa Raisi Mheshimiwa Samia Suluhu Hassan kuna mafanikio makubwa yamepatikana kama ifuatavyo:-

- Idadi ya wanafunzi wenye sifa za kuchaguliwa kujiunga na Kidato cha Tano na Vyu vya Elimu na Mafunzo ya Ufundi imeongezeka kwa asilimia **14.07** kutoka **129,854** mwaka 2020 hadi **148,127** mwaka 2021, wakiwemo wasichana **63,878** ambapo wamechaguliwa wote;
- Idadi ya wanafunzi waliochaguliwa kujiunga na Kidato cha Tano kwenye tahasusi za Sayansi na Hisabati imeongezeka kwa asilimia **14.10** kutoka **36,375** mwaka 2020 hadi **41,504** mwaka 2021 wakiwemo wasichana **17,646**;
- Idadi ya wanafunzi waliochaguliwa kujiunga na Kidato cha Tano kwenye tahasusi za Sanaa na Biashara imeongezeka kwa asilimia **25.64** kutoka **36,738** mwaka 2020 hadi **46,159** mwaka 2021, wakiwemo wasichana **24,239**;
- Idadi ya wanafunzi waliochaguliwa kujiunga na Vyu vinne vya Ufundi imeongezeka kwa asilimia **6.60** kutoka **1,499** mwaka 2020 hadi **1,598** mwaka 2021, wakiwemo wasichana **592**;
- Idadi ya wanafunzi waliochaguliwa kujiunga na Vyu vya Ualimu (Stashahada na Astashahada) imeongezeka kwa asilimia **28.44** kutoka **5,813** mwaka 2020 hadi **7,466** mwaka 2021, wakiwemo wasichana **3,535**;
- Idadi ya wanafunzi waliochaguliwa kujiunga na Vyu vya Afya imeongezeka kwa asilimia **18.44** kutoka **1,887** mwaka 2020 hadi **2,235** mwaka 2021, wakiwemo wasichana **1,162**; na
- Idadi ya wanafunzi waliochaguliwa kujiunga na Vyu vya mbalimbali imeongezeka kwa asilimia **17.42** kutoka **38,842** mwaka 2020 hadi **45,607** mwaka 2021, wakiwemo wasichana **16,704**;

- Idadi ya wanafunzi wa kujitegemea wanaofanya mtihani chini ya Taasisi ya Elimu ya Watu Wazima na kuchaguliwa kujiunga na Kidato cha Tano wameongezeka kwa asilimia **86.36** kutoka **154** mwaka 2020 hadi **287** mwaka 2021, wakiwemo wasichana **149**; na
- Shule mpya zinazodahili wanafunzi wa Kidato cha Tano kwa mara mara ya kwanza zimeongezeka kutoka shule **32** mwaka 2020 hadi shule **42** mwaka 2021.

Ndugu Wanahabari;

Napenda kutumia fursa hii kuwapongeza walimu, wazazi na walezi wote kwa juhudi walizozifanya katika ufundishaji na kuwezesha wanafunzi kufaulu vizuri. Naomba wazazi/walezi wote tuendeleo na moyo huu wa kusimamia na kufuatilia maendeleo ya watoto wetu.

Aidha, nawapongeza wanafunzi wote waliochaguliwa kujiunga na Kidato cha Tano, Vyuo vya Elimu na Mafunzo ya Ufundi. Napenda kuchukua fursa hii, kuwahimiza kuendelea kufanya bidii katika kujifunza ili waweze kufanikiwa kujiunga na mafunzo ya elimu ya juu baada ya kuhitimu Kidato cha Sita na Vyuo vya Elimu na Mafunzo ya Ufundi.

Ninawashukuru Viongozi na Watendaji wa Mikoa na Mamlaka za Serikali za Mitaa pamoja na Wananchi kwa ujumla kwa kushiriki kikamilifu kuimarisha miundombinu ya shule ikiwemo mabweni na majengo mengine yaliyowezesha shule kupokea wanafunzi wa Kidato cha Tano kwa mara ya kwanza.

Ndugu Wanahabari;

Orodha ya wanafunzi waliochaguliwa kujiunga na Kidato cha Tano na Vyuo vya Elimu na Mafunzo ya Ufundi mwaka, 2021 inapatikana kwenye tovuti ya OR-TAMISEMI ya www.tamisemi.go.tz na Baraza la Taifa la Elimu ya Ufundi ya www.nacte.go.tz.

Ndugu Wanahabari;

Pamoja na maelekezo haya, kwa mwanafunzi, mzazi/mlezi atakayekuwa na suala linalohitaji maelekezo au ufafanuzi zaidi aende katika Ofisi za Elimu za Mikoa na Halmashauri AU apige simu kwenye namba ya Kituo cha Mawasiliano cha OR-TAMISEMI kwa **namba za simu 026 2160210 au 0735 160210.**

Ahsanteni kwa kunisikiliza.



Ummu A. Mwalimu (Mb.)

WAZIRI WA NCHI, OR-TAMISEMI

1 Juni, 2021